



## XUNTA DE GALICIA

CONSELLERÍA DE MEDIO AMBIENTE, E  
ORDENACIÓN DO TERRITORIO  
Dirección Xeral de Conservación da  
Natureza



### **MEMORIA XUSTIFICATIVA DO CONVENIO DE COLABORACIÓN ENTRE A CONSELLERÍA DE MEDIO AMBIENTE E ORDENACIÓN DO TERRITORIO E A ASOCIACIÓN PARA A DEFENSA ECOLÓXICA DE GALICIA (ADEGA)**

Esta Consellería de Medio Ambiente e Ordenación do Territorio é o órgano da Administración Autonómica que ten atribuído as competencias e funcións en materia de información, educación e formación ambiental así como no fomento de programas e accións de concienciación dos cidadáns para garantir o respecto e a mellora do ambiente.

No mencionado ámbito competencial constitúe un dos obxectivos o desenvolvemento de programas de educación ambiental.

#### **Antecedentes:**

O artigo 27.30 do Estatuto de Autonomía de Galicia faculta á Xunta de Galicia para levar a cabo aquelas accións que considere necesarias para a protección, conservación e mellora dos recursos naturais e a adecuada xestión dos espazos naturais, da flora e fauna silvestres, da paisaxe e dos elementos singulares da xea de Galicia que polo seus valores e interese científico, paisaxístico, cultural e histórico requiran unha especial atención.

Ao abeiro do anterior promulgáronse os Reais Decretos 167/81, do 9 de xaneiro, 1234/83, do 20 de abril, e 1535/84, do 20 de xuño, de traspaso de funcións e servizos á comunidade Autónoma de Galicia en materia de conservación da natureza.

A Directiva 92/43/CEE, do 21 de maio de 1992, relativa á conservación dos hábitats naturais e da fauna e flora silvestres, establece que as autoridades competentes dos estados membros deben incluír entre os seus obxectivos prioritarios a contribución á garantía da biodiversidade mediante a conservación dos hábitats naturais e da fauna e flora silvestres no territorio europeo. Así mesmo, as medidas adoptadas terán como finalidade o mantemento ou restablecemento nun estado de conservación favorable, dos hábitats naturais e das especies silvestres da fauna e flora de interese comunitario.

Moitos destes principios foron incorporados ao ordenamento xurídico español mediante a Lei 42/2007, do 13 de decembro, do patrimonio natural e a Biodiversidade entre eles o relativo á necesidade de impulsar procesos de mellora na sostenibilidade do desenvolvemento, asociados a espazos naturais protexidos e a garantía da información e participación da cidadanía.

Así mesmo, a Lei 9/2001, do 21 de agosto, de Conservación da Natureza, considera como principio a conservación da biodiversidade a través do mantemento dos procesos ecolóxicos esenciais, garantindo a conexión das poboacións de fauna e flora silvestres e preservando a diversidade xenética. Para isto contéplase a participación pública, a través da cooperación e colaboración activa dos sectores sociais e económicos implicados asumindo unha responsabilidade compartida nesta conservación.

#### **Finalidade:**

Para os efectos sinalados, tense previsto formalizar coa Asociación para a Defensa Ecolóxica de Galicia (ADEGA) o instrumento convencional arriba referido por un período de vixencia que abrangue dende o día seguinte da súa sinatura, sendo de aplicación aos gastos realizados dende o 1 de xaneiro de 2016, e manterá a súa vixencia ata o 15 de novembro de 2016.

O convenio ten por obxecto establecer as condicións que rexerán a participación e colaboración entre a Consellería de Medio Ambiente e Ordenación do Territorio e a ADEGA para o desenvolvemento dun programa de educación ambiental que contempla diferentes actuacións de educación e voluntariado ambiental, centradas na conservación de especies e hábitats na xeografía galega e na loita contra as especies exóticas invasoras:

Actuacións de inventariado, recuperación e construción a través de accións de voluntariado de pequenas zonas húmidas, co obxectivo de favorecer o estudo e a conservación de especies incluídas no catálogo Galego de especies ameazadas (Decreto 88/2007), centrando o traballo preferiblemente en charcas temporais mediterráneas (hábitat 3170).

Difusión da problemática das especies exóticas invasoras e actuacións en espazos naturais protexidos, que inclúe a difusión da Exposición “*Unha Invasión Silenciosa. A biodiversidade baixo ameaza*” en centros de ensino, concellos e asociacións, así como a loita contra a flora exótica invasoras co fin de fomentar a conservación destes hábitats. Esta actuación da continuidade as accións desenvolvidas neste ámbito por ADEGA.

O instrumento convencional que se pretende asinar fundaméntase no seguinte:

A Asociación para a defensa ecolóxica de Galicia (ADEGA), é unha asociación sen ánimo de lucro que ten por obxectivo a defensa do medio ambiente galego e a súa conservación, de acordo co recollido nos seus estatutos fundacionais. Esta Asociación conta con liñas de traballo encamiñadas á posta en marcha dun modelo de desenvolvemento ecoloxicamente sustentable e socialmente xusto como son a educación ambiental e o voluntariado ambiental.

A Consellería de Medio Ambiente e Ordenación do Territorio e ADEGA comparten en común a defensa e promoción da conservación de hábitats e especies en Galicia e consideran de gran importancia o desenvolvemento conxunto de actuacións de colaboración e cooperación no ámbito da educación ambiental e de voluntariado ambiental, fomentando programas de formación, educación e información xeral, sobre a necesidade de protexer as especies de flora e fauna silvestres e de conservar os seus hábitats, con especial atención aos usuarios/as do territorio.

ADEGA ven desenvolvendo dende hai anos accións concretas de educación e voluntariado ambiental, enmarcadas en accións ou proxectos concretos de conservación de hábitats, especies, ou patrimonio etnográfico, así como de loita contra as especies invasoras. Neste sentido, dispón da infraestrutura e dos medios técnicos axeitados, así como da experiencia necesaria en educación ambiental e coordinación de voluntariado. Así mesmo, nos últimos anos consolidou unha ampla rede de voluntariado que garante unha capacidade de difusión e repercusión das actividades única en Galicia.

As singulares características das actuacións a levar a cabo no convenio, así como o marcado interese público e social destas, xunto cos medios e infraestrutura cos que xa conta ADEGA, fan que resulte sumamente difícil a súa convocatoria pública.

Por todo o anterior, entendendo por convenio o acordo de vontades adoptado por escrito entre as partes asinantes que o subscriben nun plano de igualdade, para a consecución de fins de interese común en competencias que lle son propias, e tendo en conta os principios de información mutua, a cooperación e a colaboración que inspiran as relacións das administrativas públicas, en consideración a razón de interese xeral e dadas as circunstancias concorrentes, xustifícase plenamente a adxudicación directa da axudas prevista no convenio. Todo o que se fai constar para os efectos do previsto no artigo 19.4 c) e 26.2.a) da Lei 9/2007, do 13 de xuño, reguladora das subvencións de Galicia e no artigo 11.2 da lei 4/2006, do 30 de xuño, de transparencia e boas prácticas na administración pública galega.

Polo exposto, estímase xustificada a utilización do instrumento do convenio para articular as actuacións de referencia, quedando o devandito convenio fora do ámbito de aplicación do Texto Refundido da Lei de contratos do sector público, aprobado por Real Decreto Lexislativo 3/2011, do 14 de novembro, con independencia de que, de acordo co previsto no artigo 4.2 da devandita norma, lle sexan de aplicación os principios desta Lei para resolver as dúbidas e lagoas que puidesen presentarse.

Santiago de Compostela, 28 de xullo de 2016

A directora xeral de Conservación da Natureza